

إزاي يجف ؟!

بيقولوا جف

انا عقلي خف

إزاي يجف

إزاي يجف

وهواااا وهبة ربنا

ولأرضنا

م الجنة جاي

على مصر حدف

إزاي يجف
والحضارة بين ضفوفه
وع التاريخ فارد كفوفه
والجدود من عهد آدم
منقرع خفرع وخوفو
كله بيته فوق شريطه
مرصوصين ورا صف صف

إزاي يجف
وهواا قوتي وقوت ولادي
ومقبرة تتوي الأعادي
دا التاريخ احتار ف وصفه
أيه يقول مهماً وصف

ازاي يجف
وأنا اللي باقعد برة داري
ف ضلة فيه وقت العصاري
وانتظر شوق نسمة
لجل ان تهف

إزاي يجف
واللي يشرب مرة منه
مهما يبعد غصب عنه
لازم يجيه
مهماً يلف

إزاي يجف
وهو ااااا يوم لما وقف

كتب الجواب عمرو لعمر
والرد جاله من الفاروق
بيقول له سير ربك أمر
يا نيل وروق

يا نيل وروق
إياك تزعل أهل مصر

ومهما ح يكون السبب
هما أمانة كل عصر
وأكرموا سيدنا النبي
اللي ارتضاهم للنسب
خيرة جنود الأرض منهم
يتوزن واحد بألف

ازااااااي تجف

وقالوا لي جف

وللأسف

بقى كل حي وليه كلام

قلبي ارتجف

وليلتها انا ما قدرت انام

ولا بطلت عيني الشمال

من خوفي رف

ويا دوب على قبل الشروق

قبل ان تقوم

كل الخلايق أو تفوق

جریت وواخذ بین سناني
بلهفتي ديل جلابيتي
تاه زماني وتاه مكاني
وسبت ناسي وسبت بيتي

وجيت عليه ..
علويه ..
وقفت وقلت له :
وصرخت فيه :

اجري يا نيل

اجري يا نيل
واياك تقف

اجري يا نيل
واياك تجف

اجري وروي
كل ساقية وكل غيط
واسقي ف بلدنا
كل حارة وكل بيت

وهمست له :
ندرِ عليااا للأبد
تجري يا نيل
أو دمي يجري ع الخسيس
اللي يفكر يحتجز
يوم جزء منك لو قليل

تجري يا نيل
أو دمي يجري
وداااا البديل

تجري يا نيل
أو دمي يجري
ودا البديل

ولا يوم يا نيل ممكن تجف